



李頎集卷上

五言古詩

題僧房雙桐

青桐雙拂日傍帶凌霄花綠葉傳僧磬清音潤井
華誰能事音律焦尾蔡邕家

李兵曹壁畫山水各賦得桂水帆

片帆浮桂水落日天涯時飛鴈看共度閑雲相與
遲長波無曉夜泛泛欲何之

晚歸東園

出郭喜見山東行亦未遠夕陽帶歸鷺靄靄秋稼

李雁集卷上
晚樵者乘霽歌野夫及星飯請謝朱輪客垂竿不復返

裴尹東溪別業

公才廊廟器官亞河南守別墅臨都門驚湍激前後舊交與群從十日一攜手幅巾望寒山長嘯對高柳清歡信可尚散吏亦何有岸雪清城陰水光遠林首閒觀野人筏或飲川上酒幽雲淡徘徊白鷺飛左右庭竹垂卧內村煙隔南阜始知物外情簪紱同芻狗

送綦毋三謁房給事

夫子大名下家無鐘石儲惜哉湖海上曾校蓬萊書外物非本意此生空淡如所思但乘興遠適維單車高道時坎坷故交願吹噓徒言青瑣闥不愛承明廬百里人戶滿片言諍訟踈手持蓮花經目送飛鳥餘晚景南路別炎雲中伏初此行儻不遂歸食蘆洲魚

題盧道士房

秋砧響落木共坐茅君家惟見兩童子林前汲井華空壇靜白日神鼎飛丹砂塵尾拂霜草金鈴搖霽霞上章人世隔看奕桐陰斜稽首問僊要黃精

李成集卷五
堪餌花

塞下曲

黃雲鴈門郡日暮風沙裏千騎黑貂裘皆稱羽林
子金笳吹朔雪鐵馬嘶雲水帳下飲蒲萄平生寸
心是

題神力師院

大師神傑貌五嶽森禪房堅持日月珠豁見滄江
長隨病拔諸苦致身如法王階庭藥草徧飯食天
花香樹色向高閣晝陰橫半墻每聞第一義心淨
琉璃光

九月九日劉十八東堂集

風俗尚九日此情安可忘菊花辟惡酒湯餅茱萸
香雲入授衣假風吹閒宇涼主人盡歡意林景晝
微茫清切晚砧動東西歸鳥行淹留悵爲別日醉
秋雲光

送劉四

愛君少歧嶷高視白雲鄉九歲能屬文謁帝遊明
光奉詔赤墀下拜爲童子郎爾來屢遷易三度尉
洛陽洛陽十二門官寺鬱相望青槐羅四面淥水
貫中央聽訟破秋毫應物利干將辭滿如脫屣立

言無否臧歲暮風雪暗秦中川路長行人飲臘酒
立馬帶晨霜生事豈須問故園寒草荒從今署右
職莫笑在農桑

送裴騰

養德爲衆許森然此丈夫放情白雲外爽氣連虬
鬚衡鏡合知子公心誰謂無還令不得意單馬遂
長驅桑野蠶忙時憐君久踟躕新晴荷卷葉孟夏
雉將雒令弟爲縣尹高城汾水隅相將簿領閒倚
望相峯孤香露團百草紫梨分萬株歸來授衣假
莫使故園蕪

龍門西峰曉望劉十八不至

春臺臨永路跂足望行子片片雲觸峰離離鳥渡
水叢林遠山上霽景雜花裏不見攜手人下山採
綠芷

送司農崔丞

黃鸝鳴官寺香草色未已同時皆省郎而我獨留
此維監太倉粟常對府小史清陰羅廣庭政事如
流水奉使往長安今承朝野歡宰臣應記識明主
必遷官塞外貌將武池中鴛與鸞詞人洞簫賦公
子鷄鷄冠邑里春方晚昆明花欲闌行行取高位

當使路傍看

送崔侍御赴京

綠槐蔭長路駿馬垂青絲柱史謁承明翩翩將有
期千官大朝日奏事臨赤墀肅肅儀仗裏風生鷹
隼姿一從登甲科三拜皆憲司按俗又如此爲郎
何太遲送君暮春月花落城南南隱惜別醉芳草前
山勞夢思

春送從叔遊襄陽

言別恨非一棄置我宗英向用五經笥今爲千里
行裹糧顧庭草羸馬詰朝鳴斗酒對寒食雜花宜

晚晴春衣采洲路夜飲南陽城客夢峴山曉漁歌
江水清楚俗少相知遠遊難稱情同人應館穀刺
史在郊迎只合侍丹旌翻令辭上京時方春欲暮
歎息向流鶯

宋少府東溪泛舟

登岸還入舟水禽驚笑語晚葉低衆色濕雲帶殘
暑落日乘醉歸溪流復幾許

粲公院各賦一物得初荷

微風和衆草大葉長圓陰晴露珠共合夕陽花暎
深從來不着水清淨本因心

光上座廊下衆山五韻

名嶽在廡下吾師居一牀每聞楞伽經只對清翠
光百谷聚雲色莓苔侵屋梁氣盤古壁轉勢引幽
堦長願遊薜葉下日見金爐香

贈別高三十五

五十無產業心輕百萬資屠酤亦與群不問君是
誰飲酒或垂釣狂歌兼詠詩焉知漢高士莫識越
鴟夷寄跡棲霞山蓬頭睢水湄忽然辟命下衆謂
趨丹墀沐浴著賜衣西來馬行遲能令相府重且
有函關期僂俛從寸祿舊游梁宋時皤皤邑中叟
相候鬢如絲官舍柳林靜河梁杏葉滋摘芳雲景
晏把手秋蟬悲小縣情未愜折腰君莫辭吾觀主
人意不久召京師

崔五宅送劉跂入京

行人惜寸景繫馬暫留歡昨日辭小沛何時到長
安鄉中飲酒禮客裏行路難清洛雲鴻度故關風
日寒維將道可樂不念身無官生事東山遠田園
芳歲闌東歸余謝病西去子加餐宗伯非徒爾明
時正可干躬耕守貧賤失計在林端宿昔奉顏色
慙無雙玉盤

與諸公遊濟瀆泛舟

濟水出王屋其源來不窮
泂泉數眼沸平地流清
通皇帝崇祀典詔書視三公
分官禱靈廟奠璧沉
河官神應每如答松篁氣
葱蘢蒼螭送飛雨赤鯉
噴回風灑酒布瑤席吹簫
下玉童玄冥掌陰事祝
史告年豐百谷趨潭底
三光懸鏡中淺深露沙石
蘋藻生虛空晚景臨泛美
亭臯輕靄紅晴山傍舟
檝白鷺鷺絲桐我本家
潁北出門見維嵩焉知松
峯外又有天壇東左手正
接羅浩歌眄青穹夷猶
傲清吏偃仰狎漁翁對此
川上閑非君誰與同霜
凝遠村渚月淨蒹葭叢
茲境信難遇爲歡殊未終
淹留悵言別煙嶼夕微蒙

送馬錄事赴永陽

子爲郡從事主印清淮邊
談笑一州裏從容群吏
先手持三尺令遣決如流
泉太守旣相許諸公誰
不然孤城連海樹萬室帶
山煙春日溪湖淨芳洲
葭菼連炊粳蟹螯熟下筍
鱸魚鮮野鶴宿簷際楚
雲飛面前提聽歌送離曲
且駐木蘭船贈爾八行字
當聞佳政傳

臨別送張諲入蜀

出門便為客惘然悲徒御四方維一身茫茫欲何
去經山復歷水百恨將千慮劍閣望梁州是君斷
腸處孤雲傷客心落日感君深夢裏蒹葭渚天邊
橘柚林蜀江流不測蜀路險難尋木有相思號猿
多愁苦音莫向愚山隱愚山地非近故鄉可歸來
眼見芳菲盡

題合歡

開花復卷葉艷眼又驚心蝶遶西枝露風披東幹
陰黃衫漂細藥時拂女郎砧

東京寄萬楚

濩落久無用隱身甘采薇仍聞薄宦者還事田家
衣潁水日夜流故人相見稀春山不可望黃鳥東
南飛濯足豈長往一罇聊可依了然潭上月適我
胸中機在昔同門友如今出處非優游白虎殿偃
息青瑣闥且有薦君表當看携手歸寄書不代面
蘭芷空芳菲

登首陽山謁夷齊廟

古人已不見喬木竟誰過寂寞首陽山白雲空復
多蒼苔歸地骨皓首採薇歌畢命無怨色成仁其
若何我來入遺廟時候微清和落日弔山鬼回風

吹女蘿石門正西豁引領望黃河千里一飛鳥孤
光東逝波驅車層城路惆悵此巖阿

題綦毋校書田居

常稱掛冠吏昨日歸滄洲行客暮帆遠主人庭樹
秋豈伊問天命但欲爲山遊萬物我何有白雲空
自幽蕭條江海上日夕見丹丘生事本漁釣賞心
隨去留惜哉曠微月欲濟無輕舟倏忽令人老相
思河水流

漁父歌

白首何老人篔簹蔽其身避世長不仕釣魚清江

濱浦沙明濯足山月靜垂綸寓宿湍與瀨行歌秋
復春持橈湘岫竹藝火蘆洲薪泔水飯香稻青荷
苞紫鱗於中還自樂所欲全吾真而笑獨醒者臨
流多苦辛

寄焦鍊師

得道凡百歲燒丹唯一身悠悠孤峰頂日見三花
春白鶴翠微裏黃精幽澗濱始知世上客不及山
中人僊境若在夢朝雲如可親何由覩顏色揮手
謝風塵

謁張果先生

先生谷神者甲子焉能計自說軒轅師于今幾千
歲寓遊城郭裏浪迹希夷際應物雲無心逢時舟
不繫餐霞斷火粒野服蒹荷製白雪淨飢膚青春
養身世韜精殊豹隱鍊骨同蟬蛻忽去不知誰偶
來寧有契二儀齊壽考六合同休憩彭聃猶嬰孩
松期且微細嘗聞穆天子更憶漢皇帝親屈萬乘
尊將窮四海裔車徒徧草木錦帛招談說八駿空
往還三山轉虧蔽吾君感至德玄老欣來詣受籙
金殿開清齋玉堂閉笙歌迎拜首羽帳崇嚴衛禁
柳垂香爐宮花拂仙袂祈年寶祚廣致福蒼生惠
何必待龍髯鼎成方取濟

送王昌齡

漕水東去遠送君多暮情淹留野寺出向背孤山
明前望數千里中無蒲稗生夕陽滿舟楫但愛微
波清舉酒林月上解衣沙鳥鳴夜來蓮花界夢裏
金陵城歎息此離別悠悠江海行

古塞下曲

行人朝走馬直指薊城旁薊城通漢北萬里別吾
鄉海上千烽火沙中百戰場軍書發上郡春色渡
河陽裊裊漢宮柳青青胡地桑琵琶出塞曲橫笛

斷君腸

望鳴臯山白雲寄洛陽盧主簿

飲馬伊水中白雲鳴臯上氛氲山絕頂行子時一
望照日龍虎姿攢空冰雪狀翳從殊未已峻嶒忽
相向皎皎橫綠林霏霏淡清嶂遠映村更失孤高
鶴來傍勝氣欣有逢仙遊且難訪故人吏京劇每
事多閑放室盡峨嵋峰心格洞庭浪惜哉清興裏
不見予所向

寄萬齊融

名高不擇仕委世隨虛舟小邑常歛屈故鄉行可

遊青楓半村戶香稻盈田疇爲政日清淨何人同
海鷗搖巾北林夕把菊東山秋對酒池雲滿向家
湖水流岸陰止鳴鵠山色映潛虬靡靡俗中理蕭
蕭川上幽昔年至吳郡常隱臨江樓我有一書札
因之芳杜洲

留別王盧二拾遺

此別不可道此心當報誰春風灞水上飲馬桃花
時設作好文士只令遊宦遲留書下朝客我有故
山期

無盡上人東林禪居

草堂每多暇時謁山僧門所對但群木終朝無一
言我心愛流水此池臨清源含吐山上日蔽虧松
外村孤峯隔身世百衲老寒暄禪戶積朝雪花龕
來暮猿顧余守耕稼十載隱田園蘿篠慰春汲巖
潭恣討論洩雲豈知限至道莫探元且願啓關鎖
於焉微尚存

不調歸東川別業

寸祿言可取託身將見遺慙無匹夫志悔與名山
辭紱冕謝知己林園多後時葛巾方濯足蔬食但
垂帷十室對河岍漁樵祗在茲青郊香杜若白水
映茅茨晝景徹雲樹夕陰澄古遠渚花獨開晚田
鶴靜飛遲且復樂生事前賢為我歸開歌聊鼓楫
永日望佳期

贈張旭

張公性嗜酒豁達無所營皓首窮草隸時稱太湖
精露頂據胡牀長叫三五聲興來灑素壁揮筆如
流星下舍風蕭條寒草滿戶庭問家何所有生事
如浮萍左手持蟹螯右手執丹經瞪目視霄漢不
知醉與醒諸賓且方坐旭日臨東城荷葉累江魚
白甌貯香杭微祿心不屑放神於八紘時人不識

者即是安期生

贈別穆元林

貳職久辭滿藏名三十年丹墀策頻獻白首官不
遷明主日徵士吏曹何忽賢空懷濟世業欲棹滄
浪船舉酒洛門外送君春海邊彼鄉有令弟小邑
試烹鮮轉浦雲壑媚涉江花鳥連綠芳暗楚水白
鳥飛吳煙贈鱸亦奚貴流亂期復旋金閨會通籍
生事豈徒然

李頎集卷上

李頎集卷中

七言古詩

送劉十

三十不官亦不娶時人焉識道高下房中唯有老
氏經櫪上空餘少游馬往來嵩華與函秦放歌一
曲前山春西林獨鶴引閒步南澗飛泉清角巾前
年上書不得意歸卧東窓兀然醉諸兄相繼掌青
史第五之名齊驃騎烹葵摘果告我行落日夏雲
縱復橫聞道謝安掩口笑知君不免爲蒼生

王母歌

武皇齋戒承華殿端拱須臾王母見電旌照耀麒
麟車羽蓋淋漓孔雀扇手指玄梨遣帝食可以長
生臨寓縣頭上復戴九星冠總領玉童坐南面欲
聞要言今告汝帝乃焚香請此語若能鍊魄去三
尸後當見我天皇所顧謂侍女董雙成酒闌可奏
雲和笙紅霞白日儼不動七龍五鳳紛相迎惜哉
志驕神不悅歎息馬蹄與車轍複道歌鍾杳將暮
深宮桃李花成雪爲看青玉五枝燈蟠螭吐火光
已絕

古從軍行

白日登山望烽火黃昏飲馬傍交河行人刁斗風
沙暗公主琵琶幽怨多野雲萬里無城郭雨雪紛
紛連大漠胡鴈哀鳴夜夜飛胡兒眼淚雙雙落聞
道玉門猶被遮應將性命逐輕車年年戰骨埋荒
外空見蒲桃入漢家

雜興

沈沈牛渚磯舊說多靈恠行人夜秉生犀燭洞照
洪深闢滂湃乘車駕馬往復旋赤紱朱冠何偉然
波驚海若潛幽石龍抱胡髯卧黑泉水濱丈人曾
有語物或惡之當害汝武昌妖夢果爲災百代英

威埋鬼府青青蘭艾本殊香察見泉魚固不祥濟
水自清河自濁周公大聖接輿狂千年魑魅逢華
表九日茱萸作佩囊善惡死生齊一貫祗應斗酒
任蒼蒼

送劉昱

八月寒葦花秋江浪頭白北風吹五兩誰是潯陽
客顛顛山頭微雨晴揚州郭裏暮潮生行人夜宿
金陵渚試聽沙邊有鴈聲

送郝判官

楚城木葉落夏口青山轉鴻鴈向南時君乘使者
傳楓林帶水驛夜火明山縣千里送行人蔡州如
眼見江連清漢東逶迤遙望荆雲相蔽虧應問襄
陽舊風俗爲予騎馬習家池

送王道士還山

嵩陽道士餐栢實居處三花對石室心窮伏火陽
精丹口誦淮王萬畢術自言神訣不可求我師聞
之玄圃游出入彤庭佩金印承恩赫赫如王侯雙
峯樹下曾受業應傳肘後長生法吾聞仙地多後
身安知不是 次人玉膏清冷瀑泉水白雲溪中
日方此從今不見數十年髮髮顏容只如是先生

捨我欲何歸竹杖黃裳登翠微當有巖前白蝙蝠
迎君日暮雙來飛

別梁鎰

梁生倜儻心不羈途窮氣蓋長安兒回頭轉眄似
鷗鷖有志飛鳴人豈知雖云四十無祿位曾與大
軍掌書記抗辭請刃誅部曲作色論兵犯二帥一
言不合龍額侯擊劍排衣從此棄朝朝飲酒黃公
壚脫帽露頂爭叫呼庭中犢鼻昔嘗掛懷裏琅玕
今在無時人見子多落魄共笑狂歌非遠圖忽然
遣躍紫騮馬還是昂藏一丈夫洛陽城頭曉霜白
層冰峨峨滿川澤但聞行路吟新詩不歎舉家無
擔石莫言貧賤長可欺覆篔成山當有時莫言富
貴長可托木槿朝看暮還落不見古時塞上翁倚
伏由來任天作去去滄波勿復陳五湖三江愁殺
人

放歌行荅從弟墨卿

小來好文耻學武世上功名不解取雖沾寸祿已
後時徒欲出身事明主栢梁賦詩不及宴長楸走
馬誰相數斂迹俛眉心自甘高歌擊節聲半苦由
是蹉跎一老夫養雞牧豕城東隅空歌漢代蕭相

國肯事霍家馮子都徒爾當年聲籍籍濫作詞林
兩京客故人斗酒安陵橋黃鳥春風洛陽陌吾家
令弟才不羈五言破的人共推興來逸氣如濤湧
千里長江歸海時別離短景何蕭索佳句相思能
間作舉頭遙望魯陽山木葉紛紛向人落

送從弟游江淮兼謁鄱陽劉太守

都門柳色朝朝新念爾今爲江上人穆陵關帶清
風遠彭蠡湖連芳草春泊舟借問西林寺曉聽猿
聲在山翠潯陽北望鴻鴈回湓水東流客心醉須
知聖代舉賢良不使遺才滯一方應見鄱陽虎符

守思歸共指白雲鄉

送劉方平

綺紈遊上國多作少年行二十二詞賦惟君著美
名童顏且白晢佩德如瑤瓊荀氏風流盛胡家公
子清有才不偶誰之過肯即藏鋒事高卧洛陽草
色猶自春遊子東歸喜拜親漳水橋頭值鳴鴈朝
歌縣北少行人別離斗酒心相許落日青郊半微
雨請君騎馬望西陵爲我殷勤弔魏武

雙筍歌送李回兼呈劉四

並抽新筍色漸綠迥出空林雙碧玉春風解籜雨

李廌集卷中
潤根一枝半葉清露痕爲君當面拂雲日孤生四
遠何足論再三抱此悵爲別嵩洛故人與之說

送劉四赴夏縣

九霄特立紅鸞姿萬仞孤生玉樹枝劉侯致身能
若此天骨自然多歎美聲名播揚二十年足下長
途幾千里舉世皆親丞相閣我心獨愛伊川水脫
略勢利猶埃塵嘯傲時人而已矣新詩數歲即文
雄上書昔召蓬萊宮明主拜官麒麟閣光車駿馬
看玉童高人往來廬山遠隱士往來張長公扶南
甘蔗甜如蜜雜以荔枝龍州橘赤縣繁詞滿劇曹

白雲孤峯暉永日朝持手板望飛鳥暮誦楞伽對
空室一朝出宰汾河間明府下車人吏閒端坐訟
庭更無事開門咫尺巫咸山男耕女織蒙惠化麥
熟雉鳴長秋稼明年九府議功時五辟三徵當在
茲聞道桐鄉有遺老邑中還欲置生祠

欲之新鄉荅崔顥綦毋潛

數年作吏家屢空誰道黑頭成老翁男兒在世無
產業行子出門如轉蓬吾屬交歡此何夕南家擣
衣動歸客銅鑪將灸相歡飲星宿縱橫露華白寒
風卷葉度滹沱飛雪布地悲峨峨孤城日落見棲

李所集卷中
鳥馬上時聞漁者歌明朝東路把君手臘日辭君
期歲首自知寂寞無去思敢望縣人致牛酒

愛敬寺古藤歌

古藤池水盤樹根左攬右拏龍虎蹲橫空直上相
陵突丰茸離纏若無骨風雷霹靂連黑枝人言其
下藏妖魑空庭落葉乍開合十月苦寒常倒垂憶
昨花飛滿空殿密葉吹香飯僧遍南階雙桐一百
尺相與年年老霜霰

同張貞外諷酬荅之作

洛中高士日沉冥手自灌園方帶經王湛牀頭見
周易張康傳裏好丹青鶻冠葛屨無名位博奕賦
詩聊遣意清言只到衛家兒用筆能誇鍾太尉東
籬二月種蘭蓀窮巷人稀鳥雀喧聞道郎官問生
事肯令髮髮老柴門

夏宴張兵曹東堂

重林華屋堪避暑况乃烹鮮會佳客主人三十朝
大夫滿座森然見矛戟北窓卧簟連心花竹裏蟬
鳴西日斜羽扇搖風却珠汗玉盆貯水割甘瓜雲
峯峨峨自冰雪坐對芳樽不知熱醉來但掛葛巾
眠莫道明朝有離別

荅高三十五留別便呈干十一

累薦賢良皆不就家近陳留訪耆舊韓康雖復在
人間王霸終思隱巖竇清冷池水灌園蔬萬物滄
江心淡如妻子歡同五株柳雲山老對一牀書昨
日公車見三事明君賜衣遣爲吏懷章不使郡邸
驚待詔初從闕庭至散誕由來自不羈低頭授職
爾何爲故園壁掛烏紗帽官舍塵生白接籬寄書
寂寂於陵子蓬蒿沒身胡不仕藜羹被褐環堵中
歲晚將貽故人耻

崔五六圖屏風各賦一物得烏孫佩刀

烏孫腰間佩兩刀刃可吹毛錦爲帶握中枕宿穹
廬室馬上割飛翳蟪塞執之魍魎誰能前氣凜清
風沙漠邊磨用陰山一片玉洗將胡地獨流泉主
人屏風寫竒狀鐵靴金環儼相向回頭瞪目時一
看使予心在江湖上

魏倉曹東堂桺樹

愛君雙桺一樹竒千葉齊生萬葉垂長頭拂石帶
煙雨獨立空山人莫知攢青蓄翠陰滿屋紫穗紅
英曾斷目洛陽墨客遊雲間若到麻源第三谷

古行路難

漢家名臣楊德祖四代五公享茅土父子兄弟綰
銀黃躍馬鳴珂朝建章火浣單衣繡方領茱萸錦
帶玉盤囊賓客填街復滿座片言出口生輝光世
人逐勢爭奔走瀝膽隳肝惟恐後當時一顧登青
雲自謂生死長隨君一朝謝病還鄉里窮巷蒼苔
絕知己秋風落葉閉重門昨日論交竟誰是薄俗
嗟嗟難重陳深山麋鹿可爲鄰魯連所以蹈東海
古往今來稱達人

少室雪晴送王寧

少室衆峯幾峯別一峯晴見一峯雪隔城半山連

青松素色峨峨千萬重過景斜臨不可道白雲欲
盡難爲容行人與我翫幽境北風切切吹衣冷惜
別浮橋駐馬時舉頭試望南山嶺

照公院雙橙

種橙夾階生得地細葉隔簾見雙翠抽條向長未
及肩泉水遶根日三四青青何必楚人家帶雨疑
煙新著花永願香爐灑甘露夕陽時映東枝斜南
庭黃竹爾不敵借問何時堪掛錫

古意

男兒事長征少小幽燕客賭勝馬蹄下由來輕七

尺殺人莫敢前鬚如蝟毛磔黃雲隴底白雪飛未
得報恩不能歸遼東小婦年十五慣彈琵琶解歌
舞今爲羌笛出塞聲使我三軍淚如雨

送康洽入京進樂府歌

識子十年何不遇只愛歡遊兩京路朝吟左氏嬌
女篇夜誦相如美人賦長安春物舊相宜小苑蒲
萄花滿枝柳色偏濃九華殿鶯聲醉殺五陵兒曳
裾此夜從何所中貴由來盡相許白袂春衫仙吏
贈烏皮隱几臺郎與新詩樂府唱堪愁御妓應傳
鳩鵲樓西上雖因長公主終須一見曲陽侯

送陳章甫

四月南風大麥黃棗花未落桐陰長青山朝別暮
還見嘶馬出門思舊鄉陳侯立身何坦蕩虬鬚虎
眉仍大顙腸中貯書一萬卷不肯低頭在草莽東
門酤酒飲我曹心輕萬事如鴻毛醉卧不知白日
暮有時空望孤雲高長河浪頭連天黑津吏停舟
渡不得鄭國遊人未及家洛陽行子空歎息聞道
故林相識多罷官昨日今如何

聽董大彈胡笳聲兼寄語弄房給事

蔡女昔造胡笳聲一彈一十有八拍胡人落淚沾

邊草漢使斷腸對歸客古戍蒼蒼烽火寒大荒陰
沉飛雪白先拂商絃後角羽四郊秋葉驚撼撼董
夫子通神明深松竊聽來妖精言遲更速皆應手
將徃復旋如有情空山百鳥散還合萬里浮雲陰
且明嘶酸雛鴈失群夜斷絕胡兒戀母聲川爲淨
其波鳥亦罷其鳴烏孫部落家鄉遠邏娑沙塵哀
怨生幽音變調忽飄灑長風吹林雨墮瓦迸泉颯
颯飛木末野鹿呦呦走堂下長安城連東掖垣鳳
凰池對青瑣門高才脫略名與利日夕望君抱琴
至

緩歌行

小來託身攀貴遊傾財破產無所憂暮擬經過石
渠署朝將出入銅龍樓結交杜陵輕薄子謂言可
生復可死一沉一浮會有時棄我翻然如脫屣男
兒立身須自強十年閉戶賴水陽業就功成見明
主擊鍾鼎食坐華堂二八蛾眉梳墮馬美酒清歌
曲房下文昌宮中賜錦衣長安陌上退朝歸五陵
賓從莫敢視三省官僚揖者稀早知今日讀書是
悔作從來狂俠非

鮫人歌

鮫人潛織水底居側身上下隨游魚輕綃文綵不
可識夜夜澄波連月色有時寄宿來城市海島青
冥無極已泣珠報恩君莫辭今年相見明年期始
知萬族無不有百尺深泉架戶牖鳥沒空山誰復
望一望雲濤堪白首

彈碁歌

崔侯善彈碁功妙盡於此藍田美石清如砥白黑
相分十二子聯翩百中皆造微魏文手中不足比
緣邊度隴未可嘉烏跂星懸正復斜迴飈轉拍速
飛電拂四取五旋風花坐中齊聲稱絕藝仙人六
博何能繼一別常山道路遙爲余更作三五勢

李頎集卷中

李頎集卷下

五言律詩

晚歸東園

荆扉帶郊郭稼穡滿東菑倚杖寒山暮鳴梭秋葉
時回雲覆陰谷返景照霜梨澹泊真吾事清風別
自茲

送相里造入京

子月過秦正寒雲覆洛城嗟君未得志猶作苦辛
行暖酒嫌衣薄瞻風候雨晴春官含笑待驅馬速
前程

送錢子入京

夜夢還京北鄉心恨擣衣朝逢入秦使走馬喚君
歸驛路清霜下關門黃葉稀還家應信宿看子速
如飛

寄鏡湖朱處士

澄霽晚流闊微風吹綠蘋鱗鱗遠峯見淡淡平湖
春芳草日堪把白雲心所親何時可爲樂夢裏東
山人

送綦毋三寺中賦得紗燈

禪室吐香燼輕紗籠翠煙長繩掛青竹百尺垂紅
蓮熠爚衆星下玲瓏雙塔前含光待明發此別豈
徒然

送人尉閩中

可歎芳菲日分爲萬里情閩門折垂柳御苑聽殘
鶯海戍通閩邑江航過楚城客心君莫問春草是
王程

宴陳十六樓樓枕金谷

西樓對金谷此地古人心白日落庭內黃花生澗
陰四鄰見踈木萬井度寒砧石上題詩處千年留
至今

覺公院施烏石臺

石臺置香飯齋後施諸禽童子亦知善衆生無懼
心苔痕蒼曉露盤勢出香林錫杖或圍繞吾師一
念深

送人歸沔南

梅花今正發失路復何如舊國雲山在新年風景
餘春饒漢陽夢日寄武陵書可即明時老臨川莫
羨魚

望秦川

秦川朝望迥日出正東峰遠近山河淨逶迤城闕
重秋聲萬戶竹寒色五陵松客有歸歟歎悽其霜
露濃

送盧逸人

洛陽爲此別攜手更何時不復人間見祇應海上
期清溪入雲木白首卧茅茨共惜盧敖去天邊望
所思

達奚吏部夫人寇氏挽歌

存歿令名傳青青松栢田事姑稱孝婦生子繼先
賢露濕銘旌重風吹鹵簿前陰堂從此閉誰誦女
詩篇

送顧朝陽還吳

寂寞俱不偶，裏糧空入秦。宦塗已可識，歸卧包山春。
舊國指飛鳥，滄波愁旅人。開尊洛水上，怨別柳花新。

塞下曲

少年學騎射，勇冠并州兒。直愛出身早，邊功沙漠垂。
戎鞭腰下插，羌笛雪中吹。膂力今應盡，將軍猶未知。

送竇參軍

城南送歸客，舉酒對林巒。暄鳥迎風轉，春衣度雨

寒。桃花開翠幙，柳色拂金鞍。公子何時至，無令芳草闌。

五言排律

聖善閣送裴迪入京

雪華滿高閣，苔色上鈎欄。藥草空堦靜，梧桐返照寒。
清吟可愈疾，攜手暫同歡。墜葉和金磬，飢鳥鳴露盤。
伊流惜東別，灞水向西看。舊託含香署，雲霄何足難。

贈別張兵曹

漢家蕭相國，功蓋五諸侯。勲業山河重，丹青錫命

優君爲禁鬻壻爭看玉人遊荀令焚香日潘郎振
藻秋新成鸚鵡賦能衣鷓鴣裘不憚軒車遠仍尋
薜荔幽苑梨飛絳葉伊水淨寒流雪滿故關道雲
遮祥鳳樓一身輕寸祿萬物任虛舟別後如相問
滄波雙白鷗

奉送漪叔遊潁川兼謁淮陽太守

罷吏今何適辭家方獨行嵩陽入歸夢潁水半前
程聞道淮陽守東南卧理清郡齋觀政日人馬望
鄉情疊嶺雪初霽寒砧霜後鳴臨川嗟拜手寂寞
事躬耕

送皇甫曾遊襄陽山水兼謁韋太守

峴山枕襄陽滔滔江漢長山深卧龍宅水淨斬蛟
鄉元凱春秋傳昭明文選堂風流滿今古煙島思
微茫白鴈暮衝雪青林寒帶霜蘆花獨戍晚柑實
萬家香舊國欲茲別輕舟眇未央百花亭漫漫一
柱館蒼蒼按俗荆南牧持衡吏部郎逢君立五馬
應醉習家塘

題少府監李丞山池

能向府亭內置茲山與林他人驕驕馬而我薜蘿
心雨止禁門肅鶯啼官柳深長廊闕軍器積水背

李所集卷下
城陰窗外王孫草牀頭中散琴清風多仰慕吾亦
爾知音

二妃廟送裴侍御使桂楊

沅上秋草晚蒼蒼堯女祠無人見精魄萬古寒猿
悲桂水身歿後椒漿神降時回雲迎赤豹驟雨颯
風狸受命出炎海焚香徵楚詞乘驄感遺跡一弔
清川湄

龍門送裴侍御監五嶺選

萬里番禺地官人繼帝憂君爲柱下史將命出東
周歇馬傍川路張燈臨石樓稜稜靜踈木淅淅響

寒流榔葉四荒外梅花五嶺頭明珠尉佗國翠羽
夜郎洲夷俗富珍產土風資宦游心清物不雜弊
革事無留舉善必稱最持姦當去尤何辭桂江遠
今日用賢秋

長壽寺粲公院新甃井

僧房來往久露井每同觀白石抱新甃蒼苔依舊
攔空竝宛轉下長綆轆轤盤境界因心淨泉源見
底寒鍾鳴時灌頂對此日間安

送喬琳

草綠小平津花開伊水濱令今不得意孤負帝鄉

春口不言金帛心常任屈伸阮公能飲酒陶令肯
羞貧陽羨風流地滄江游寓人菱歌五湖遠桂謝
八公鄰青鳥迴孤棹白雲隨一身朝從秣陵上月
映石頭新未可逃名利應須在縉紳汀洲芳杜色
勸爾暫垂綸

送盧少府赴延陵

問君從官所何日府中趨遙指金陵縣青山天一
隅行人懷寸祿小吏獻新圖北固波濤險南天風
俗殊春江連橘柚晚景媚蒲菰漠漠花生渚亭亭
雲過湖灘沙映村火水霧斂檣烏回首東門路鄉

書不可無

魏倉曹宅各賦一物得當軒石竹

羅生殊衆色獨爲華表滋雖雜蕙蘭處無爭桃李
時同人趨府暇落日後庭期密葉散紅點菱條驚
紫蕤芳菲看不厭採摘願來茲

送暨道士還玉清觀

仙官有名籍度世吳江濱大道本無我青春長與
君中州俄已到至理得而聞明主降黃屋時人看
白雲空山何窈窕三秀日氛氲遂此留書客超遙
煙駕分

送東陽王太守

江臯杜衡綠芳草日遲遲檜楫今何去星郎出守
時形襜問風俗明主寄俾發令下不徒爾人和當
在茲昔年經此地微月有佳期洞口桂花白巖前
春草滋素沙靜津瀨青壁帶川坻野鶴每孤立林
颺常晝悲

送劉主簿歸金壇

與子十年舊其如離別何宦游鄰故國歸夢是滄
波京口青山遠金陵芳草多雲帆曉容裔江日晝
清和縣郭舟人飲津亭漁者歌茅山有仙洞羨爾

再經過

宿香山寺石樓

夜宿翠微半高樓聞暗泉漁舟帶遠火山磬發孤
煙衣拂雲松外門清河漢邊峯巒低枕席世界接
人天靄靄花出霧輝輝星映川東林曙鶯滿惆悵
欲言還

七言律詩

送魏萬之京

朝聞游子唱離歌昨夜微霜初渡河鴻鴈不堪愁
裏聽雲山况是客中過關城曙色催寒近御苑砧

聲向晚多莫見長安行樂處空令歲月易蹉跎

宿瑩公禪房聞梵

花宮仙梵遠微微月隱高城鍾漏稀夜動霜林驚
落葉曉聞天籟發清機蕭條已入寒空靜颺杳仍
隨秋雨飛始覺浮生無住着頓令心地欲歸依

送李回

知君官屬大司農詔幸驪山職事雄歲發金錢供
御府晝看仙液注離宮千巖曙雪旌門上十月寒
花輦路中不覩聲明與文物自傷留滯去關東

寄綦母三

新加大邑綬仍黃遊與單車去洛陽顧眄一過丞
相府風流三接令公鄉南川粳稻花侵縣西嶺雲
霞色滿堂共道進賢蒙上賞看君幾歲作臺郎

寄司勳盧員外

流澌臘月下河陽草色新年發建章秦地立春傳
太史漢宮題柱憶仙郎歸鴻欲度千門雪侍女新
添五夜香早晚薦雄文似者故人今已賦長揚

題璿公山池

遠公遁跡廬山岑開山幽居祗樹林片石孤峰窺
色相清池白月照禪心指揮如意天花落坐卧間

房春草深此外俗塵都不染惟餘玄度得相尋

題盧五舊居

物在人亡無見期閑庭繫馬不勝悲窓前綠竹生
空地門外青山如舊時悵望秋天鳴墜葉嶺岼枯
柳宿寒鴟憶君淚落東流水歲歲花開知為誰

五言絕句

奉送五叔入京兼寄綦母三

陰雲帶殘日悵別此何時欲望黃山道無由見所
思

七言絕句

送韓鵬

為政心閒物自閒朝看飛鳥暮飛還寄書河上神
明宰羨爾城頭姑射山

送崔嬰赴漢陽

中外相連弟與兄新加小縣子男名纔年三十佩
銅印知爾弦歌漢水清

遇劉五

洛陽一別梨花新黃鳥飛飛逢故人携手當年共
為樂無驚蕙草惜殘春

野老曝背

百歲老翁不種田
惟知曝背樂殘年
有時捫虱獨搔首
目送歸鴻籬下眠

失題

紫極殿前朝伏奏
龍花會裏日相望
別離歲歲如流水
誰辨他鄉與故鄉

送五叔

吏部明年拜官後
西城必與故人期
寄書春草年年色
莫道相逢玉女祠

李頎集卷下

